



Quist'annu dinù s'hè fattu u **Cuncorsu di poesia di A Croce** chì hà cunfirmatu tutte e speranze d'annu. Sò venute participazione numerose, è da tanti canti di Corsica chì propriu piglia issa manifestazione un versu impurtantissimu, da sudisfà tutti quelli chì s'impachjanu di creazione puetica.

Hè sigura ch'ellu ci hè una brama di spressione, è chì una chjama cum'è quella ch'ella hà, a municipalità di A Croce, a generosità di lampà, sullecita l'estru d'une-pochè di persone chì, essendu o nò digià avvezze à a poesia, un averianu forse micca, per certi, nè l'occasione nè u rigiru di fà si cunnosce altrò.

A raccolta hà campatu a ghjuria chì n'hà salutatu a qualità. Ispirazione varia, da a caccia o i fiori à a riflessione nantu à quistioni di sucetà o di religione; l'amore di siguru ci hà datu belle poesie, è l'amore di stu paese è a brama d'arricordà si di induve omu ne hè per quelli luntani...

Unepochi di partecipanti d'annu si sò ritrovi fidi à a chjama di quist'annu. Ghjè un incoragimentu per l'organizadori è una sudisfazione di vede ch'ellu pò trae, un cuncorsu chì si stabilisce regolare, è in un periodu favurevule di l'estate, ch'ellu pò trae un invitu forte à a creazione. Almenu a ci speremu cusì !

E donne un sò micca magioritarie in a participazione, ma a qualità ci hè ; quist'annu trà i trè premiati sò duie donne. (Ch'ell'un si credi à nisun favore speciale, mancu in a ghjuria e donne un sò numerose, è tuttu u travagliu di leghje, di stimà è di premià s'hè fattu senza nomi). Si prega ch'elle un si scordinu di participà oramai, chì si pò puru approntà penne, u paese di A Croce avà un ci pò piu privà di u nostru piacè. Ne sianu ringraziati tutti l'organizadori, è felicitati, soprattutto a municipalità di A Croce ch'ella preside Marie Strà, u merre. ■

E. BONERANDI

U to nome stampatu

U to nome, l'avia stampatu
Nantu à a rena molle.
Mà u mare u s'hà trascinat
Incù isse trè parolle :
«Ti tengu cara».

U to nome, l'avia stampatu
Nant'à un fogliu di carta
Ma u Muntese u s'hà purtatu
Incù issa chjama sparta :
«Veni incu mè».

U to nome l'avia stampatu
Nant'à una chjappeta
Ma l'acqua piuvana l'hà sguagliatu
Cù u so scrittu di seta :
«A tè, per sempre».

U to nome, l'avia stampatu
Nant'à una buchja zeppa
Ma, annu, u focu hà brusgiatu
L'alivu, fronde è ceppa.

U to nome, u m'aghju stampatu
Nant'à u core zittu
Per tè, d'Amore ingutuppatu
Hè u mo solu dirittu

M.J. MAMBRINI

Tù

Capillera di vitalba
È di vecchia,
Visu chjaru cum'è l'alba,
Una treccia,
Volta è gira po' mi friscia
Misgia !

Villutu di le to mani
Chè tù stinzi,
Ochji chjari cusì strani
Chè t'appinzi,
U mio capu si ne schjatta
Ghjatta !

E to labbre cum'un fiore
Veranincu,
Mi vene u batti core
È po' trincu
Pè issa bocca chjarasgina
Mina !

Dulcezza di la to pelle
Assuffocu,
Nant'à l'onda à mez'à stelle
Pianu vogu
U mio sangue si ne guasta
Basta !...

P. VACHET NATALI

Sò nata qui

Da un ragiu matinale
In l'acura inguernale
Da una lacrima chì corre
Da un' abissu di dolore
Da u neru scrittu in core
D'una mamma chì si more
Eo, sò nata qui.

Da l'abbozzu cumuvente
D'una fiura inventata
Simile à un sfrullu d'ala
À a vita arrubata
Da un basgiu di zitellu
Da pientu d'orfanellu
Eo, sò nata qui.

Da sta terra impastata
À oliu di sudore
Da ogni stentu genitore
Da stu celu suminata
À stelle di passione
D'avvene è di ragione
Eo, sò nata qui.

D'una alba culpita
D'una stella infritulita
Da issa calisgina in pettu
Chì senza fine brusgia
Pè guariscene l'offesa
È fasciane a ferrita
Eo, sò nata qui.

Da stu paese inghjuliatu
Da stu paese castigatu
Da sta Corsica tantu amata
Dissegnata à estru di fata
Da balcheghju di battellu
Da cantu di sturnellu
Eo, sò nata qui.

G. MATTEI